

北京圖書館
編

北京圖書館藏家譜叢刊
閩粵
(僑鄉) 卷

北京圖書館出版社

節堂祖世德堂祠址圖

吳堯階繪

北京图书馆
编

北京圖書館藏家譜叢刊

閩粵
(僑鄉)卷

第 49 冊

北京圖書館出版社

節堂祖世德堂祠址圖

吳堯階繪



北京图书馆
编

北京圖書館藏家譜叢刊
閩粵
(僑鄉)卷

第 50 册

北京圖書館出版社

節堂祖世德堂祠址圖

吳亮階繪

族譜成書後致 諸同宗啓事

一本屆修譜用欸概商之有力者擔任除將出入欸編造細數附之卷八末頁以供 公覽而昭大信此外並無發函捐欸情事特此聲明

一本譜印工紙料每部科合大洋伍元左右而編輯校對頗費心力始得成書務宜妥爲保存

一各房名號官階妻妾子嗣悉憑 來稿照登第恐校對偶疏致有訛錯 諸君校出請卽 函知以便更正

一同宗中旅居外省外縣致未知本年有修譜之舉者在所難免仍望 互相知會或有所聞請 隨時開單函寄福州西門街水陸軒京果店後懷卿處留存底稿以備下屆續修

一同輩之中每多同名查有已出仕者若概請更名不無窒礙今
議凡年幼者或未出仕者仍請自行更換希酌之
一新添人丁取名之時務各檢譜一閱以免重名是爲至要
右函敬請
諸同宗 共鑒

民國二十四年九月

族副懷崇
日族長懷卿同啓
支長鎮冰

薩氏族譜序

伯柔輯族譜成問序於余曰今入閩之祖當在守仁世次之定名各有攸分願假明公一言可乎余因少與伯柔同學曰美哉子志也孝敬藹然見矣蓋木必有本水必有源彼物則爾矧昭代文獻羽儀之舊乎昔蘇明允以所親立譜至五世而不得不爲塗人相視者親盡故也然以九族而論由邇及遠莫非一氣之流通故考其所自出而推其世次俾後世知所覈實者譜之所由作也今守仁之後或列鉅卿或膺民社或爲聞人孝子不可謂不盛矣因按其譜先之以宗支繼之以著述生者逝者繫日月以紀之娶者配者揭姓氏以識之他如修身有要正家有宜子教有義族教有睦凡各條目悉本蘇氏之法吁是譜之作將使一展帙間孰爲昭孰爲穆孰爲親疏遠近名諱之定昭若指掌矣後之子孫知敬其所

尊愛其所親禮順而倫理無斁端不有賴乎雖然源深而澤長本固則枝茂若張公藝忍而九世昌陳江州義而七百口合此圖之作披閱成訓以一人而至千百人以一世而至千百世繩繩奕奕世守振揚則彌遠彌新而薩氏之蕃衍寧有涯哉

明隆慶丁卯賜進士資善大夫戶部尚書前都察院右都御史奉勅督漕運兼巡撫鳳陽等處地方鍾陽馬森拜題

序

自古受姓得氏或因封爵之名或因食邑之等或因所生之地以爲姓雖其原委不同而要之子孫相承世守弗替則未之有易也吾閩薩氏代著勲伐賜姓於雁門白天錫先生由翰林應奉出幕閩憲詞章文采輝映東南實與奎章鐵崖諸子登壇設壇狎主齊盟爲有元一代詞人之冠繼而天與守仁二先生皆以前進士起家歷官豫章閩南卜居三山之通賢坊再傳至鈍菴先生與予祖探花澹軒公同登甲第讀書中祕至躋卿貳綰宮詹授經邨邸翼贊景皇濬祥啓後足稱衣冠望族云予因蘭譜世講締交哲胤景明君得詳觀其所修譜牒爰念吾閩山川之秀甲於天下姑無論固始八姓從王渡江而南即薩氏一門父子祖孫之閒天竺看雨景陽聽鐘虞道園一字之師稱文章者若而人還金禱雨異夢格

天甦母病幾三載稱孝行者若而人五登科第三歷秩宗掇巍科而教天府稱膺仕者又若而人不亦彬彬推盛美哉今景明之譜成矣分條起例一本昔賢其尊祖敬宗無異心也則亦無異道也孝親弟長無異道也則亦無異心也所以聯族屬而垂悠遠者端在是與將使後之人一展卷閒體祖宗合族之心得後人亢宗之道源遠而流斯長木蕃則枝益茂以無忝其受姓得氏之家聲則庶幾景明作譜之初心哉

賜進士奉直大夫禮部精膳司員外郎莆田林崑頓首拜題

雁門薩氏宗譜序

天下稱氏族者不一咸有所附麗以成世家如葛藟之庇綿相依侈大獨雁門薩氏其世次人物行誼見聞仕宦出處迥然特出諸名族者也按薩氏起雁門都刺公號天錫登泰定進士官南臺御史彈劾不避謫閩廉訪知事弟天與官江西路總管與天錫偕揭曼道學士後斯虞伯生學士集同時有元朝四才子之譽不特文章爲先正所宗而騷壇諸體尤開晉安風雅之倡者也再傳守仁公仲禮登元統進士福建行中書省以官爲家隨世爲閩人三傳用謙公琅以孝德神奇爲祝融神所避事載閩史四傳琅子琦字廷珪登明宣德進士官詹事侍郎當英殿北狩盡忠國事持家訓俗悉革先世色目舊習凡飲食居處婚姻葬祭一本朱元晦夫子家禮爲表率推薩氏之先雖遭逢隆遇傳世久大悉由忠孝起家

居官鯁宜學術淵源大其家聲乃滄桑變易舊帙無多孝廉公與相日惟遵祖敬宗憐憐睦族不置前此序其創始繼後述其增修皆有名公鉅手推仁孝之心爲增美之詞睹茲聿修毋侈前規毋縱虛美條而晰信而有徵務令文獻之徵於一家者俾明德達人之後大顯天下惟是數傳以來科名筮仕之可紀者得以增補居家孝友鄉閭謹厚得以互載與夫有功先業雍睦子姓賙給宗黨種種善行俱可並傳抑亦旌善獎勸之一端也嗟乎輓近徇虛聲而忘實行至有冒他族而援別氏者遙遙華胄之譏其與雁門氏特立不互自成一家者異矣崇德象賢吾於薩氏卜其昌於世世他時爲雁門薩氏纂輯世家請以斯譜爲徵謹序

塔江八十叟後學林涵春盥題

重修族譜序

吾宗肇基西北累著勲伐受知於元世祖英宗朝自直齋公始以經術受姓由翰林應奉出佐閩憲著有雁門集行世守仁公復以進士起家檢校福建行中書省卜居閩之通賢坊再傳至鈍菴公發身甲第讀書翰苑教天府而貳春官方將柄用而遽卒於位雖吾宗之奕葉相承科甲繼起而載籍典故之文缺然弗備皆以諸祖敷歷中外未遑纂修故也至予祖少園公筮仕江右謝政里居始取先世故牒略加修輯甫成簡編遂捐館舍今閱世雲初三百餘載而同宗孫子其麗又倍於前不有譜以維持之將使人易世疏而爾我其祖秦越其心又何以善諸後耶予用是滋懼爰命諸子容輩考訂舊譜參稽遺聞編爲家乘先之以宗支次之以本傳又次之以誥勅酬贈之類凡有裨於吾祖吾宗者雖一言一行亦

必彙而傳之所以大合族而戒後人用心亦云至矣昔范文正公有言吾吳中宗族甚衆於吾固有親疏自祖宗視之均子孫也今吾宗之子姓雖繁而敦本溯源誠能心祖宗之心行祖宗之行和睦族屬無或分於遠邇篤行孝弟無或閒於窮通庶幾行葦興歌保世滋大之休方興未艾以無負吾祖垂裕之盛心哉

八世孫希亮拜手謹識

重修族譜序

吾宗族譜始修自 少園公繼自 愧隱公詳而不紊簡而有文
輯成昭示來許在康熙丙辰迄今百有餘載矣由入閩 始祖至
愧隱公九世而下子孫蕃衍其麗數倍於前己未秋會城大水祠
牆圯壞姪 龍光 仝姪孫 振森 捐錢三千貫飭材修葺董其事者知
宜知麟 兩人大堂基址仍原向首不敢易先人舊制然棟宇維新
金碧輝煌已壯觀瞻祠左舊有奎光閣貽香亭面壁軒聽濤精舍
爲誦讀之所悉葺而新之又建福德祠於祠之右因山疊磴直抵
峯巔西北之湖光山色盡入眼中誠大觀也今孟夏工竣集族恭
安 列祖神主自十一世心字暨十四世聿字計一百八十七人
一時老幼羣集輩分整然則吾宗之支分派衍無不共昭神敬矣
伏讀葛齋公所識閱世雲初三百餘載而同宗孫子其麗又倍於

前不有譜以維持之將使人易世疎而爾我其祖秦越其心何以善後祠之碑記又曰俾我本支維賢維孝其世守而光大焉祖訓煌煌敢不驚心而聰聽乎謹於七世伯祖祥字公後分爲一支七世祖思字公列爲本支自八世祖葛齋公傳至九世祖愧隱公分爲五大宗各支彙列照譜編次使知支脈繼繼繩繩昭穆了然而善後事宜則載諸凡例務恪守遵循流傳罔替庶幾數典而不忘矣族姓日繁八世祖之胞弟第三房希文公後子姓蕃衍自能修誌不及備載百餘載續修已數過時可以後按支分續誠爲簡便顯揚盛典復有望於後人時

嘉慶五年歲次庚申季秋望後十二世孫國霖謹識

續修族譜序

族之有譜所以上溯本源下綿瓜瓞以傳信也吾宗譜系少園公經始於前葛齋公集成於後賜姓受氏派衍支分遷居卜宅由元而明迄本朝康熙丙辰三百餘歲色目之祖凡三世入閩之祖凡九世宗伯鈍菴公爲景泰帝師賜葬於大夢山而建祠焉累代之祖功宗德顯榮褒大脈絡分明條理井井矣自丙辰以來至嘉慶庚申又百三十餘載族姓蕃昌霽襟公續修自十世人字至十四世聿字支脈相承昭昭可考而其中尙有未全備者伯祖都刺直齋公著有雁門集二十卷高宗純皇帝收入四庫全書按

國語錫嘉名又推原其祖父思蘭不花公更定爲薩拉布哈阿魯赤公更定爲傲拉齊都刺公更定爲都拉旣受姓於元代

賜葬於前明復

賜名於

聖朝天子

命錫三朝

恩榮四世從古所未有也謹遵

欽定改正弁之篇首自康熙壬子而後我家人才蔚起宴鷹揚歌
鹿鳴登黃甲入館選膺內外任者接踵而興鄉會兩試題名錄亦
當詳列爲後世子孫能讀父書者法伏讀八世祖修譜凡例有曰
先之以宗支繼之以列傳輔之以誥勅酬答各綴其人之下以表
著其生平雖吉光片羽在所兼收富哉言乎予今年八十有二雍
正乾隆以後之事皆親見而能詳之故自祖父伯叔兄弟姪敦水
木篤友于有功於宗祠支祠者詳爲之傳以垂奕禩俾知夫先世